

# Beogradske Novine

Broj 8.

BEOGRAD, utorak 18. januara 1916.

GODIŠTE II.

UREDNIŠTVO i UPRAVA: BEOGRAD, ČUBRINA ULICA 3.,  
TISKARA: ULICA VUKA KARADŽIĆA br. 26.

SVI SE DOPISI ŠALJU NA ADRESU:  
„BEOGRADSKE NOVINE“, ETAPNA POŠTA 131.

## Crnogorci položili oružje.

Zvanični izvještaj.

K. B. Beč, 17. januara.

Kralj Nikola crnogorski i njegova vlada zamolili su na 13. januara, da se obustave neprijateljstva i povedu pregovori za mir. Mi smo odgovorili, da se ovoj molbi može udovoljiti, ako crnogorska vojska bezuslovno položi oružje. Crnogorska je vlada jučer primila zahtjev o bezuslovnoj predaji oružja.

Zamjenik glavar generalnog stožera:  
podmaršal von Höfer.

## Konac rata protiv Crne Gore.

**Crnogorska vojska je bezuslovno položila oružje.**

To je novi najteži udarac, koji je do sada zadesio sile četvornog sporazuma. Strahovit poraz Rusa u maju prošle godine, uništenje hrabre srpske vojske i žalosni fijaslo dardanelske ekspedije, nijesu zadali takav udarac vojničkom prestižu sila sporazuma, kao polaganje oružja od strane crnogorske vojske. Polaganje oružja bez ikakvih uslova! Nitko ne može da poriče kralju Nikoli i njegovim Crnogorcima hrabrost i srčanost, — dakle šta treba da znači, kad on polaže oružje pred pobjedonosnim austro-ugarskim četama, i kad se predaje na milosti i nemilosti?

Kralj Nikola je uvidio, da je potpuno propala stvar, za koju se je do sada borio i za koju su do sada njegovi sinovi prolijevali svoju krv. Kralj Nikola je uvidio, da su austro-ugarske puške i topovi jači od sviju ruskih, francuskih, engleskih, a naročito talijanskih obećanja. Nesumnjivo je ovaj čas uvigjanja mudroga kralja Nikole, koji je tast dva kralja i moćnog ruskog velikog kneza, najteži čas u njegovom životu, ali je on ipak izabranik sreće. Pred nesavladljivim nastupanjem austro-ugarskih četa vidio je on kako se ruši sve ono, što je on sa toliko muke i mudrog rada podigao. I tako je učinio on, što je jedino i bilo moguće učiniti, povje-

rio se velikodušnosti monarhije, u čiju se velikodušnost toliko puta uvjerio, i bezuslovnim polaganjem oružja spasao je svoj narod od propasti, koju je Petar Karadjorgjević priredio svome narodu. Ovaj kralj zavjerenik nije ni u posljednjem času htio da se odvoji od sila sporazuma, i žrtvovao je bez premišljanja posljednje ostatke svoje hrabre vojske. Kralj Nikola je pokušao nemoguće, ali on, kepec nije mogao da se bori sa džinom, i kada je uvidio, da i njega ostavljaju bez pomoći kao i njegovog zeta u Beogradu, obustavio je neravnu borbu.

U Beču i u Budimpešti, kao i u saveznicima Berlinu, Sofiji i Carigradu, proslaviti će se ulicama najnoviji uspjeh. Uništenje crnogorske vojske generala Kövessa djelo je slavnije nego i jedno izvršeno u ovome ratu. Centralne vlasti i njeni saveznici imaju sada opet jednog srčanog neprijatelja manje, a vojsci od generala Kövessa odrješene su ruke za nova junacka djela.

U Rimu će se malo radovati ovom najnovijem djelu Austro-Ugarske vojske. Tamo se sada savjetuju i dan i noć, ali zeleni stol za kojim se drže savjetovanja pokriva samo velika, neizmijerna briga.

## Bogojavljenje i vodoosvećenje.

6./19. januaru, na Bogojavljenje, biti će svečano vodoosvećenje. To je sveti pravoslavni praznik, lijepi praznik pun duboke pobožnosti i visoke simbolike. Ova svečanost će ove godine imati naročito obilježje, prvi put će na svečanosti uzeti udjelacarske i kraljevske čete. Kada će sveštenstvo blagosivljati vodu Dunava, Save i Drine, austro-ugarske puške i topovi ispaliti će počasnu paljbu. Prvi put u ovoj zemlji ispaliti će se čorci preko ovih triju historijskih voda, iz pušaka se neće prosuti smrtonosno olovo, nego samo pozdrav živima. I ovaj pozdrav, koga na dan pravoslavnog praznika šalju vodama Dunava, Save i Drine austro-ugarski vojnici, treba da znači, da od sada ova tri vodena puta, ne znače više razdvajajuću prepreku između Srbije i moćne susjedne monarhije, nego da tim putevima dolazi mir i povjerenje od jedne obale drugoj, i da se preko puteva starog neprijateljstva grade mostovi novog prijateljstva.

Njegova Preuzvišenost, generalni guverner, sa časnicima svoga štaba, prisustvovati će lično ovoj svečanosti. On u krajevima posjednutim od carskih i kraljevskih četa predstavlja najveću vlast carevine, on predstavlja lično cara i kralja Franju Josipa. Zato njegovo prisustvo dobija još i mnogo, mnogo veći značaj, nego običnu vojničku svečanost. Ovim se objavljuje srpskome narodu, da moćna monarhija, ognjište tolikih narodnosti, poštuje vjeru, i da će je održati na visini.

## Izveštaj austro-ugarskog generalnog štaba.

K. B. Beč, 17. januara.

### Rusko bojište:

Ruske vojske na besarabijskoj granici i na frontu istočne Galicije, nijesu ni jučer nastavile svoje navale. Svukud je vladao mir. Samo kod Rancze su naše čete nakon žestokog boja, protjerali neprijatelja iz njegovih prednjih položaja, sraznili njegove strijeljačke jarke i postavili nove zaprjeke od žica.

U području vojske nadvojvode Josipa Ferdinanda odbijena su tri ruska napada.

### Talijansko bojište:

Traju artiljerijske borbe na primorskoj i tirolskoj fronti. Naše su čete napustile položaj oko crkve u Ostaviji, jer je neprijatelj na to mjesto koncentrisao topovsku paljbu. Kod Gorice su naše letilice prisilile neprijateljske balone, da se spuste, pa su bombardovale neprijateljske logore.

Zamjenik glavara glavnog stožera podmaršal pl. Höfer.

## Divljenje neutrala o snazi Austro-Ugarske.

### Glas iz Danske.

K. B. Kopenhagen, 16. januara.

„Extrabladet“ piše: Ruskom se ofenzivom smjeralo očevidno, da se odkloni pritisak centralnih sila na Balkan, naročito na Crnu Goru. Megjutim su austro-ugarske čete osvojile ovih dana čak i neosvojivi Lovćen i o tim austro-ugarskim vojskama, koje su jednovremeno zadržale rusku ofenzivu, osvojile Crnu Goru, održale u osmom mjesecu svoje položaje protiv Italije, pričaju vojnički upravni četvornog sporazuma, da se nalaze pred slomom. Osvajanjem je Lovćena uzeta najjača prirodna tvrgjava i zadobljena prevlast na Jadranima, što se u Italiji s velikim bolom osjeća.

## Naši saveznici o zauzeću Cetinja.

K. B. Carigrad, 17. januara.

„Ferdžuman i Hakikat“ odaje poštu hrabrosti austro-ugarskih četa, koje su se ponovno odlikovale prilikom zauzeća Lovćena i Cetinja. „Mi srdačno pozdravljamo srčane čete savezne Austro-Ugarske i uvjereni smo, da će vojska, koja je u sred zime izvršila tako hrabro djelo i potukla neprijatelja, izvojevati još i veće pobjede.

K. B. Sofija, 17. januara.

Povodom zauzeća Cetinja piše „Balkanska Pošta“: Time je učinjeno znatno djelo za dovršenje ratne akcije na Balkanu. Zauzeće Lovćena i posjedanje Cetinja djelo je poglavito upravljeno protiv Italije. Srdačno pozdravljamo naše moćne zaveznike za izvojevani uspjeh i nadamo se, da se četvorni sporazum neće još dugo moći držati u Albaniji.

## Italija hoće da pomogne Srbiji i Crnoj Gori.

K. B. Paris, 17. januara.

„Petit Journal“ javlja iz Rima: Neočekivani povratak kralja ima za cijel, da se s princem Danilom sporazume o svima mjerama za potporu Srbije i Crne Gore, zatim da se ispita pitanje, postojili za Italiju potreba, da u ratu saveznika uzme učešća na svima frontovima.

## Austrijski trgovinski odnosi na Balkanu i Orientu.

### Organizacija austrijskih privrjednih interesa.

Da bi se pretresla sva pitanja, koja bi mogla pripomoći organizaciji austrijskih trgovinskih i privrjednih pitanja na Balkanu i na Orientu. održana je u donjoaustrijskom obrtnom društvu prije neki dan sjednica, na kojoj su uzeli učešća u ime opštine bečke načelnik dr. Weisskirchner, magistratski direktor dr. Nüchtern, počasni predsjednik obrtnog društva tajni savjetnik dr. Exner, u ime austrijskog trgovinskog muzeja tajni savjetnik dr. I. N. Baernreither, vitez pl. Kuczynski i odjelni savjetnik dr. Karminski; u ime izvozne komisije ministarstva trgovine odjelni savjetnik dr. Hochdorf, zatim zastupnici bečke trgovačke komore, donjoaustrijskog izvoznog društva, i predstavnici pojedinih industrijskih i trgovačkih saveza.

Predsjedajući je predsjednik Schiel, naglasio, da je potrebno, da se i u Austriji provede organizacija za zaštitu naših trgovačkih, industrijskih i privrjednih interesa na Balkanu, kao što je to već učinjeno u Ugarskoj. Glavni je sekretar dr. Kobatsch pročitao zatim referat. U referatu se ukazuje na organizacije osnovane već u Njemačkoj i Ugarskoj, za trgovinske i privrjedne odnose sa balkanskim državama, Bugarskom, Turskom i t. d. i naglašuje se potreba slične organizacije i u Austriji. Austro-Ugarska je do sada u trgovinskim odnosima na Balkanu zauzimala prvo mjesto (sa 21%). Poslije nje dolazila je odmah Engleska, pa Njemačka. Izvoz iz Austro-Ugarske popeo se u 1913. godini od 245 milijona kruna na preko 400 milijona, a ako se uzme u obzir azijska Turska i Egipt, onda se izvoz od 280 milijona popeo na preko 500 milijona kruna. Od ovoga je iznosio izvoz iz Ugarske oko 12%. Izvoz u Bosnu popeo se od 112 na 130 milijona kruna. I naš uvoz sa Balkana bio je znatan. Organizacija bi imala da ispuni slijedeće zadatke: propagandu (pomoću novinstva, izložbama i putovanjima); potpomaganje trgovinskog saobraćaja, zatim riješenje sviju trgovinsko političkih pitanja, naročito rad u okviru trgovinskog zbliženja balkanskih država centralnim vlastima. Dr. Baernreither je saopštio, da je opšta izvozna sekcija trgovinskog muzeja namjerna, da obrazuje posebnu balkansku sekciju, koja bi poslije mogla da provodi u djelo sve postavljene zadatke. Velika propaganda je neophodno potrebna, a i temeljno pretresanje sviju saobraćajnih pitanja. Naročito je od značaja neposredan trgovinski dodir. Najvažnije je pak, da Austrija u ovome radi naporeda sa Njemačkom, jer su ova pitanja u tjesnoj vezi sa planom za trgovinsko zbliženje sa Njemačkom, Bugarskom i Turskom, čime bi se sasvim istisla sa Balkana i Orienta sile sporazuma, što bi bilo od vrlo velikog značaja za našu trgovinu i industriju. Načelnik Broche složio se sa izloženim programom i predložio, da se trgovinskom muzeju povjeri stvaranje potrebne organizacije.

I ostali govornici, megju njima predsjednik opštine dr. Weisskirchner, sekretar komore dr. Pistor, narodni zastupnik Friedmann, složili su se u svemu u stvaranju potrebne organizacije. Tajni savjetnik dr. Baernreither predlaže još, da se sastavi i uži odbor, u kome bi svaka zainteresovana organizacija imala po jednog zastupnika. Ovaj uži odbor imao bi da bude pridodat balkanskoj sekciji trgovinskog muzeja i sa njom zajedno da radi na provođenju organizacije, radnog programa i svega ostalog. Najzad su primljeni predlozi doktora Baernreithera i načelnika Broche.

## Balkanske vijesti.

### Žalopojka Petra Karagjorgjevića.

— Docno kajanje. —

Carigrad, 16. januara.

Po jednom izvještaju „Lloyd Ottoman“-a Petar Karagjorgjević je prilikom svog bavljenja u Valoni sasvim otvoreno priznao, da gaje samo njegovo slijepo povjerenje u Rusiju i u sile sporazuma dovelo u težak položaj, u kome se sada nalazi. On je u svoje vrijeme htio, da ispuni sve uslove iz austro-ugarskog ultimatum, ali Rusija to nije dozvolila i obećala je, da će priskočiti u pomoć Srbiji, koja se još nije ni oporavila od dva posljednja rata, i da će sa svojom vojskom pregaziti Austro-Ugarsku. Rat je za sile sporazuma došao i suviše rano, jer one su na njega računale tek 1917. godine i htjele su, da sačekaju, dok Rusija potpuno sagradi svoje strategijske željeznice. Ali sile sporazuma strahovale su, da će Austro-Ugarska i Njemačka, poslije sarajevskog atentata, ubrzati svoja ratna spremanja, zato su i htjele rat. Da je on — Petar Karagjorgjević — mogao samo i slutiti, kako će sile sporazuma održati obećanja, koja su mu dali, ne bi se on ni trenutka dvoumio, da prihvati sve zahtjeve austrijskog ultimatum.

### Misija velikog kneza Borisa.

Beznadežan zadatak.

Bukarest, 17. januara.

Kao što je već javljeno, carev nećak, veliki knez Boris stigao je u Bukarest, da ponovo povede pregovore izmegju Rusije i Rumunije. Veliki knez nije odsio u kraljevom dvoru, nego u ovdašnjem ruskom poslanstvu, i tamo je primio više članova vlade. Veliki knez nije do sada mogao da govori sa kraljem Ferdinandom, jer se kralj nalazi u lovu kod Petra Carpa. U mjerodavnim rumunjskim krugovima ne vjeruje se u uspjeh misije velikog kneza i drže, da je isključeno, da će rumunjska vlada promjeniti svoje dosadašnje držanje.

### Srpska vlada u Brindisi.

K. B. Rim, 17. januara.

„Agenzia Stefani“ javlja: Članovi srpske vlade, sa činovnicima ministarstava, ukupno četrdeset lica, kao i diplomatski predstavnici sila četvornog sporazuma akreditovani kod srpskog dvora, prispjeli su u Brindisi.

### Nasilna vladavina entente u Grčkoj. — Bezobzirno uništavanje grčke državne imovine.

K. B. Solun, 17. januara.

„Agence Havas“ javlja: Juče je jedno odjeljenje savezničke vojske porušilo željezničku stanicu u Kilindiriu i jednovremeno je pokvarena i pruga na prilično dalekom odstojanju.

### Opsadno stanje u Ateni.

Sofia, 17. januara.

Grčka vlada rešila je, da na dan otvaranja grčke komore, dakle 24. januara objavi opsadno stanje u Ateni.

### Pohvala austro-ugarskih topova na Dardanelima.

K. B. Carigrad, 17. januara.

U svojem izvještaju podnetom senatu pomenuo je Enver paša izašiljanje austro-ugarskih topova Skodine tvornice na Dardanele i istakao je njihovo uspješno učešće u borbama protivu Engleza.

## Opskrba Beograda.

Prva je bila briga carsko i kraljevskih vlasti, kada su uzele u svoje ruke upravu Beograda, da se u prvom redu pobrine za opskrbu grada, pa je u tom pogledu doslije učinjeno mnogo, koliko to prilike u opšte, a napose prilike u zemlji samoj dozvoljavaju. Danas, gdje se je svojim domovima u Beograd vratio velik broj gragjana, a dnevice se vraća sve više, pitanje izdašne opskrbe grada postaje sve važnije. Ne opskrbe same, nego jevtine opskrbe. Mi smo to pitanje raspravili u razgovoru sa nekolicinom ovdašnjih uglednijih trgovaca. Kao organ javnosti mi ćemo u glavnome saopštiti tok ovog rasgovora onako, kako je on tekao, da se čuje izraz želja ovdašnjih trgovaca.

Beogradski je trg za snabdjevanje dnevnim namirnicama, pored malobrojnosti prodavalaca, još je u mnogome oskudan. Na trgu nema svakog dana potrebnih, a često puta ni najpotrebnijih namirnica. To je glavni uzrok, što su životne namirnice skupe, pa ako ovako i dalje ostane, one će vjerovatno biti još i skuplje, jer se stanovništvo Beograda primjetno svakog dana sve više množi. Skupoću u Beogradu osjećaju svi staleži, a razumje se, sirotinji ponajviše. Kako bi se današnja skupoća mogla suzbiti, pa da život u Beogradu bude lakši za svakog? Na ovo pitanje, nije lako odgovoriti, ali mi ćemo

vam, gospodine uredniče, ipak sa svim otvoreno, kao što vi to i želite, iznijeti svoje mišljenje.

Na prvom je mjestu potrebno, da se trg poveća sa što moguće većim brojem prodavalaca. To je moguće postići samo na taj način, ako se seljacima i seljankama, dakle neposrednim proizvođačima dozvoli iz najbliže, pa iz udaljenije okoline Beograda što slobodniji dolazak u grad. Kad tu slobodu kretanja seljački svijet bude osjetio, beogradski će trg vrlo brzo oživjeti. Uvećati će se broj prodavalaca i cijene će brzo postati umjerene. Pored ovoga ima još i drugi način, kojim bi se još izvjesnije mogao olakšati život u Beogradu. Koliko smo mi izvješteni, udaljenija okolina Beograda, s mederevski, požarevački i valjevski okrug imaju još u dovoljnoj količini namirnica. Iz tih okruga mogao bi se Beograd i sad, kao što je i uvijek do sad bilo, snabdjevati namirnicama. Mi smo još u ratnom stanju, njegovi još zakoni danas još vrijede, pa se promet ne može tako slobodno razvijati kao u mirno doba. U Beogradu ima danas dosta ispravnih trgovaca, koji bi u svome i u opštem interesu voljni bili, da odu u te okruge, da kupe u narodu za beogradski trg svih potrebnih namirnica i da ih ovdje prodaju po daleko nižoj cijeni, no što je današnja. Znamo pouzdano, da se u tim okruzima danas pro-

daje govedina po 1.50 dinara klgr., svinjetina po 1.80—2 dinara, mast po 2.50—3 dinara, da u tim okruzima ima prilična količina ugojenih svinja, razne krupne i sitne stoke, pernate živine, raznog povrća, brašna i t. d., Da napomenemo još i ovo. Trebalo bi zabraniti špekulantima prekupljanje namirnica na savskom pristaništu, i na periferiji grada od seljaka, jer je ta trgovina, koja se u posljednje vrijeme prilično razvila, vrlo štetna za potrošače. Megjutim čujemo, da su carsko i kraljevske vlasti ovaj nepošteni posao obustavile, pa budno paze, da se ovakova šta više ne dogodi.

Odnosno oživljavanja trgovine u Beogradu, a tu mislimo našu čaršijsku trgovinu, postoje prilične teškoće. Njiko više ne želi, da radi svoj posao nego li mi trgovci. Iznošeći vam, gospodine uredniče, naše mišljenje na koji bi se način mogla trgovina u Beogradu koliko toliko oživiti, mi ćemo se ujedno dotaći i svega onoga, što trgovinu u sadašnjim prilikama otežava. Naše su radnje danas s robom vrlo proregjene, mi u našim radnjama nemamo sve vrste robe, naročito nemamo robu za proljetnu sezonu. Potrebno nam je naše radnje popuniti novom robom, a to možemo učiniti samo tako, ako se izvjesnom broju trgovca beogradskih dozvoli odlazak do Beča, Budimpešte, Praga

## Podlistak.

### Borba.

Od Halil Ziad bega, bivšeg sultanovog tajnika.  
— Prepričano po turskom. —

Hurra! Hurra! Dižući visoko naoštrene sablje, o koje su se odbijali zraci sunca, u galopu su konjanici jahali kroz livadu. Visoko se podiže prašina, obavija i ljude i konje, a cijela četa izgleda kao crni oblak, koji se munjevitom brzinom približuje, da sve proguta.

Kroz dolinu, opkoljenu sa sviju strana planinama oprezno napreduje pješadija, da zauzme položaje. Časnici podižu sablje i glasno se čuju njihove zapovjesti. Jasni uzvici, razgovori i glas trube i doboša odjekuju sa stijena. Sunce se gubi iza oblaka, dajući mu divan sjaj, i dok se tako gube posljednji sunčevi zraci, nastaje veče.

Postepeno su posjednuti i dol i brijeg, i topovska grla imaju tačno odregjeni pravac na horizontu.

Hurra! Hurra! U mirnoj dolini dugo odjekuju uzvici. Kroz vazdušni etar probijaju sebi put puščana zrna, velika topovska džulad i šrapneli, kovitlajući vazduh, praveći polukrug, da bi se malo poslije spustili tamo, gdje je neprijatelj. Daleko tamo na horizontu vidi se bljesak, za trenutak koji liči na plamenu zmiiju, spremnu da rasprostire smrt i pustoš.

Hurra! Hurra! Zviždanje i fijuk zrna, jak trube, glas doboša i urlanje preplašenih životinja, kao i glasno komandovanje časnika, stapa se sve ujedno, u moćnoj i snažnoj harmoniji. Mrka noć se gubi u velikoj vatri. Gusti dim pokriva horizont, da bi pred nebom prikrio strahote, koje je ljudska ruka učinila na zemlji. Iz

topovskih grla izlaze džulad, jedno za drugim. A u svem ovom moćnom komešanju, gube se jauči i uzvici ranjenih i umirućih. U ovoj atmosferi poraza i kiši od džuladi, ljudi su kao uveo list na grani. Sve je preplašeno i izumrlo. Ništa nije ostalo, osim žalosnih ostataka borbe. Ljudi su ovom lijepom kraju napravili strašno groblje. Svuda leže krvave žrtve i mrtva tijela.

Sa divnim sjajem podiže se jutrom sunce. Divna je bila zemlja, kad je juče sunce zašlo za brjegove. Ali prvi zraci, koji sada ožariše zemlju, pokazaše sve strahote i pustoš. S bolom se gleda na sunce.

## Narodno iz Bosne.

### Staranje o majci.

Muslimanska majka došla je kod age Janjičara i žalila se gorko, što se njen sin ništa o njoj ne stara i što ona zato mora da propada. Aga je mirno saslušao, i reče joj da izigje i pred vratima malo pričekaj.

Kad je aga povukao nekoliko dimova iz svog velikog čibuka, pogledao je kroz prozor na ulicu i primijetio mladića od 18—20 godina, koji je nosio torbu u ruci. Pozvao ga je i rekao mu bez mnogog premišljanja: „Čuješ, dijete, kako to, da se ništa ne staraš o tvojoj majci?“

„Milostivi gospodaru“, odgovori mladić, „ta ja nemam majke. Moja je mati umrla još prije deset godina.“

„Čuti“, izdera se aga i naredi, da se mladiću udari četrdeset batina po stopalu.

Pošto je naredba izvršena, pozvao je staru i zapitao mladića:

„Nikogoviću, jel' sad tvoja majka?“

„Gospodaru, kad ti to kažeš, tako je.“

„Čuj dakle. Vodi je kući, a ako još koji put čujem žalbu protiv tebe, dina mi, biti ćeš sto puta gore kažnjen nego sada. A sad — idi.“

I siromah mladić podiže staru na legja, ponese je kući, postavi je u začelje, otvori svoju torbu, ispeče crnu kavu, i ugosti staru vrlo prijateljski.

Po podne je došao i stariji brat iz čaršije. Kada je vidio staru, koja se rasporetila u začelju i zadovoljno brbljaše, pitao je brata:

„Tko ti je to ovdje?“

„Ta to je naša majka, Boga ti, ko bi drugi i mogao biti?“

„Kakva majka, budalo, zar ne znaš, da je naša majka umrla još prije deset godina.“

„Batali“, odgovori mlagji brat, „idi ti to kaži agi Janjičara, a ne meni.“

### Pogledi jednog magarca na život.

Seljak se krenuo na put sa svojim magarcem. Kad su došli do šume, legoše oboje, da se odmore. Prošlo je kratko vrijeme, kada se iz daleka čuo šum opalog lišća i krhanje suvih grana. Preplašeno skoči seljak i reče magarcu: „Ustani, magare, dolaze razbojnici.“

Magare se ne pomiče i odgovori lijeno: „Šta su to razbojnici, gospodaru?“

„To su, magare moje, pljačkaši, palikuće neljudi, pa će i nas možda opljačkati.“

„A meću li oni dva sedla na legja?“ upita magare.

„To ne, i oni meću jedno sedlo, kao što i ja to radim.“

„Onda bježi sam, ja ostajem ovdje, jer mi je svejedno, služio tebi ili njima.“

drugih većih trgovačkih mjesta u Austro-Ugarskoj. Mi, trgovci, nijesmo nikakvi političari, mi gledamo samo svoj trgovački posao, pa s toga držimo, da bi se nadležne vlasti ovoj našoj želji mogle odazvati. U ostalom i tu bi se mogli postaviti izvjesni uslovi, koje ćemo mi vrlo rado ispuniti. Velika teškoća za našu trgovinu, da ne reknemo i glavna, nalazi se u pobijanju naših novčanica. Zbog toga je danas ispravnom trgovcu vrlo teško prodavati robu; na svoju štetu ne može je dati, a tražiti dvostruku cijenu zbog toga, što je novčanica smanjena sa 50% ne dozvoljava mu obraz. Pobijanje novčanice sa polovinom njene vrijednosti otežava ne samo trgovinu, nego je i glavni uzrok skupoći svih namirnica u Beogradu. Ako sadanja vrijednost novčanica duže potraje, svijet će, naročito srednji stalež brzo osirotiti; potrošiti će ono malo sačuvanih novaca, i šta će onda biti — pasti će na teret samoj vlasti. Mi znamo posve dobro, da krivnja za ovo pada na srpsku vladu, koja se ni malo ne brine za pokriće novčanica, koje je izdavala bez cijeli i bez granica. Mi smo zbog toga zahvalni carsko i kraljevskim oblastima za trud u ovoj stvari, pa se nadamo, da će nastupiti doskora bolje prilike. Moguće će ipak poći za rukom vrijednost dinara s vremenom podići na njegovu prijašnju visinu.

Blгодарimo vam, gospodine uredniče, što ste prema nama bili toliko pažljivi i saslušali s gotovošću naša mišljenja i želje.

Mi iznašamo ove izjave bez komentara, pa ćemo i u buduće rado strana mišljenja iznašati pred javnost.

## Nar. privrjeda.

### Velika kupovina žita Engleske u Rumunjskoj.

Iz Bukaresta se javlja: Kako se zvanično javlja, kupio je jedan engleski sindikat 80.000 vagona pšenice, žetve 1915. po 3200 leva od vagona. Ugovor će biti danas podpisan. Isplata će se odmah izvršiti, ali kupljeno žito ostati će u Rumuniji dok se ponovo ne otvore Dardanele.

### Ruski dugovi.

„Novoje Vremja“ saopštava: Od kako je odpočeo rat, teret duga Rusije povećao se na 7850 milijona rubalja, i to 4 milijarde 50% obaveznog duga državne blagajnice, 3 milijarde zajmova na duže rokove, 850 milijona zapisano po serijama državne rente. Od svih tih iznosa primila je na sebe Državna Banka 3250 milijona, privatne banke 400 milijona, 150 milijona dolaze na mjenične portfelje, 4050 milijona na unutarnje novčane trgove.

### Bugarska snabdjeva Grčku žitom.

Jedno saopštenje lyjonske „Dépêche“ demantuje najbolje sve vijesti francuskih listova o zaostavanju odnosa izmeđju Grčke i Bugarske. Istom listu javljaju iz Atene, da se grčka vlada obratila bugarskoj vladi s molbom za žito potrebno u izvjesnim pograničnim krajevima Grčke, da se bugarska vlada odazvala ovoj molbi Grčke, i da će od sada Bugarska snabdjevati Grčku sa žitom.

## Željeznički spoj Hrvatske sa Dalmacijom i druga tračnica na pruzi Karlovac—Oštarije.

List „Eisenbahn“ javlja: Kako je poznato pruga Budimpešta—Rijeka, ima samo jednu tračnicu. Gradnjom željezničke pruge Ogulin—zemaljska granica blizu Knina i otvaranjem priključne pruge Karlovac—zemaljska granica blizu Metlike, ima se očekivati u skoroj budućnosti neposradnu liniju iz Ljubljane preko Bubnjarci—Karlovac—Ogulin—Knin do Splita. Zbog mogućnosti ovakog neposrednog prometa, nadati se, tako važnom porastu posla, da se promet ne će moći nikako razvijati na onom dijelu pruge Karlovac—Oštarije ugarske državne željeznice, radi česa će se spomenuti dio pruge morati pretvoriti u prugu sa dvije tračnice. Planovi, koji su bili učinjeni od posebne gragjevne uprave, pomno su ispitani i odobreni su jednodušno za dalje izvršenje. Ostvaranje druge tračnice za javni promet uslijediti će vjerovatno u isto vrijeme kada bude svršena hrvatsko-dalmatinska željeznička sveza.

### Osnivanje japanske banke u Kini.

Pišu nam: Japanska je vlada podnijela parlamentu predlog o osnivanju jedne banke, čije će glavno sjedište biti u Šangaju, a imati će u svima većim gradovima Kine svoje filijale. Obrtni je kapital utvrgjen na 20 milijona jena. Dioničari mogu biti Japanci i Kinezi. Predsjednik i podpredsjednik, koji će upravljati poslovima, moraju biti japanski podanici. Banki je dato pravo, da izdaje novčanice. Japan jamči 7% kao najveću stopu interesa.

## Razne vijesti.

### Oduševljenje u Zagrebu povodom junačkog držanja hrvatskih četa.

Iz Zagreba javljaju: Povodom najnovijeg junačkog držanja hrvatskih četa na istočnoj fronti, i povodom pobjeda koje su hrvatske čete izvojevale posljednjih dana na besarabijskoj granici protiv neprijateljske navale, priregjena je prije neki dan vojnička bakljada u zagrebačkim ulicama. Tri vojne glazbe, koje su pratili oko 1000 vojnika i mnoštvo gragjana, prošle su kroz zagrebačke ulice, i zaustavile se pred banovom palačom i stanom vojnog zapovjednika, gdje su priregjene serenade.

### Crcni postaju drski.

Značajne su česte pritužbe u francuskoj i engleskoj štampi, radi drskosti crnaca u kolonijama. Bernski „Bund“ primjećuje, da je ova „drskost“ pojmljiva, otkada Francuska i Engleska crnce pozivaju u vojsku „da u Evropi prave red“.

### Spremanja za proljetni rat.

Američke novine javlja, da su Francuska, Italija i Rusija nakupovale u Americi mnogo ratnog pribora za proljetni rat.

### Poklon Sven Hedina centralnim vlastima.

„Frankfurter Zeitung“ javljaju iz Berlina: Svedski je učenjak Sven Hedin podario cijelokupni prihod svoje knjige „Narod pod oružjem“, u iznosu od 75,830.000 maraka, njemačkom i austro-ugarskom crvenom križu.

### Litavske novine.

Iz Königsberga se javlja: Jedini litavski list „Debartis“, koji je do sada izlazio u Tiflisu, odpočeo sad da izlazi u Kovnu. Izdavač je poslanik zemaljskog sabora Steputat.

### Predavanje Björn Björsona.

Na molbu Skandinavskog Društva, držao je 7. ov. mj. u veče u velikoj dvorani kršćanskog društva mladi Björn Björnson svoje predavanje „Na tri fronta“, u kome je opisao svoje utiske u raznim ratištima. I ako je predavanje držano na norveškom jeziku, posjeta je bila ipak ogromna. Među prisutnima su bili poslanici triju nordijskih zemalja s većim brojem osoblja poslanstva. Predavanje je izazvalo veliko zadovoljstvo sviju prisutnih. Naročito su jak utisak učinili opisi o zvijerstvima kozaka. Veliki dio predavanja zauzima je opis blagodijetnog rada Njemačke i Austro-Ugarske u posjednutim predjelima. Mnogi ruski Poljaci izjavili su predavaču svoje zadovoljstvo što su jednom oslobođeni ruskog ropstva.

### Pronagjen je bakterijom pjegavog tifusa.

Iz Sofije javljaju: Ovdje se očekuje dolazak američkog ljekara Harry Plotza, koji vjeruje, da je pronašao bakteriju pjegavog tifusa. Doktor Plotz je mladi newyorški ljekar, koji je u New-Yorku duže vrijeme ispitivao lješeve ljudi, koji su umrli od pjegavog tifusa. Kada se pojavila zaraza pjegavog tifusa u Srbiji, krenuo se doktor Plotz, u pratnji svog suradnika dr. Bähr-a na Balkan. Oba američka ljekara došla su onda u Skoplje, i tamo im je pošlo za rukom, da pronagju dotle nepoznati bakteriju pjegavog tifusa. Serumom, koji je poslije napravljen, kalamnjeno je, poslije ulaska bugarske vojske u Skoplje, oko 3000 bolničara, bolničarki i časnika, a među njima i bugarski princ Ćiril. Rezultati ovog kalamnjenja za sada još nisu poznati. Prije kratkog vremena je doktor Plotz bio u Beču, gdje mu je bio stavljen na raspoloženje za njegova ispitivanja sterilizacioni institut. Poslije kratkog bavljenja u Galiciji otići će ovih dana dr. Plotz opet u Skoplje, gdje će nastaviti svoja naučna istraživanja.

### Psetarina.

Carsko i kraljevsko gradsko zapovjedništvo izdalo je slijedeću zapovjed: U Beogradu smiju se psi na užici voditi. Za svakoga psa platiti će se godišnje 20 kruna. Svaki pas mora da nosi jednu biljegu. Ta biljega dobiva se kod varoškog odbora Makenzijeva ulica br. 41 uz plaćanje od 20 kruna. Svaki pas, koji se nagje poslije 10 januara bez biljege biti će uhvaćen u uništen. Zatajenje psetarine kazniti će se sa globom od 200 kruna ili zatvorom od 3 mjeseca. U slučaju ponovljenja ovog prestupka kazniti će se najstrožije.

U svima beogradskim srezovima moraju se svi psi držati na lancu, osim čobanskih pasa, kojima ali treba privézati na vrat drvene klince. Oni psi, koji nijesu kod stada ili čorde ne smatraju se kao čobanski psi. Svi drugi psi, koji se slobodno skitaju biti će ubijeni od oružništva ili vojske. Svaki kod koga se nevezeni pas nagje, biti će kažnjen od komandanta odjela sa 50 kruna globe ili 30 dana zatvora.

### Pljačkaši u njemačkoj uniformi.

Seljaci Milan Živanović i Danilo Ilić iz sela Lipe, strjeljani su 3. januara u Smederevu, jer su uhvaćeni da preobučeni u uniformi njemačkih vojnika vrše pljačku.

### Streljan.

Protivno naredbi vojnih vlasti, Ćedomir Stefanović iz Lapova zakopao je 1 oktobra u svojoj bašti 15 bombi. Presudom ratnog suda u Kragujevcu osugjen je 21. decembra na smrt, a 23. decembra izvršena je smrtna presuda.

# Najnovije brzojavne vijesti.

## Neistinita vijest.

K. B. Beč, 16. januara.

Talijanska telegrafaska agencija „Agenzia Stefani“ rasprostrla je 14. januara slijedeći telegram: Jedan je austro-ugarski izvidnički brod tipa „Novara“ torpedovan 13. januara od francuskog podvodnog broda „Foucoult“, koji je pridodat našoj pomorskoj sili, i potopljen je.

Na ovo se primjećuje: Pošto austro-ugarska flota srećom nije izgubila ni jedan brod, to se mora uzeti, da se „Foucoult“ prevario i potopio je jedan saveznički brod.

Način ratovanja naših neprijatelja postaje za nas sve više izvor nepomućene veselosti. Pošto ne mogu ništa da učine našoj i naših saveznika vojsci i mornarici, oni pokušaju, da potopljenjem svojih sopstvenih trupa poberu lavorike, koje su im tako potrebne.

## Njemački car ozdravio.

K. B. Berlin, 16. januara.

Njemački car, pošto se potpuno oporavio, otputovao je na bojno polje.

## Ratna zamorenost u Rusiji. Neraspoloženje u Engleskoj.

K. B. Kopenhagen, 16. januara.

„Politiken“ javlja iz Bergena: Ruski putnici opisuju stanje u Rusiji najcrnijim bojama. Strahovita zima proždire mnogo žrtve. Među sirotnijom, naročito u Moskvi i Petrogradu ovladalo je besposličjenje uslijed čega je među radnicima izbilo jako neraspoloženje protivu Engleske, koja se za brzi svršetak rata vrlo malo zauzima. U velikoj je večini stanovništva ovladala ratna zamorenost. Čeznja za mirom svakim danom je sve veća.

## Važna audijencia.

Atena, 16. januara.

Bugarski poslanik Pasarov bio je u podožjoj audijenciji kod kralja Konstantina. Ovoj audijenciji pridaje se ovdje veliki značaj, s tim više, što kralj, koji se još u bolesničkoj postelji nalazi, ne prima nikog osim svoje najbliže okoline i ministra predsjednika Skuludisa.

## Perzija objavila rat Engleskoj i Rusiji.

K. B. Carigrad, 17. januara.

Prema pouzdanim vijestima iz Perzije, generalni gouverner Luristan-a, Nisam es Saltaneh, koji je poznat zbog svojih patriotskih osjećaja, preuzeo je vodstvo nad perzijskim narodnim četama, koje se bore protiv Rusa i Engleza, i objavio je rat Rusiji i Engleskoj. Borbe se već vode.

## Borba engleskih radnika protivu vojne službe.

K. B. London, 16. januara.

Sa 653.190 protivu 38.100 glasova odbili su rudarski radnici u jednoj konferenciji uvogjenje vojne dužnosti; 25.240 uzdržalo se od glasanja. O načinu, koji će oporba uzeti protivu samog zakona, nije se govorilo. To je ostavljeno za drugu konferenciju, koja će se uskoro održati. Rezolucija rudarsko radničke konferencije zahtjeva, da se zakon povuče ili da ne stupi u snazi.

## Potopljen engleski brod.

K. B. London, 17. januara.

Prema jednom izvještaju Loyd-a, potopljen je engleski parobrod „Gognet“, 4396 tona.

## Englesko-francuski prekori protivu Italije.

K. B. Paris, 17. januara.

Cjelokupna francuska štampa sažaljeva nerad saveznika na Jadranu, naročito oštro kritikuje Italiju, koja je bila obvezana, da Crnoj Gori pri-tekne u pomoć.

Prvi balkanski stručni kritičari pojedinih listova priznaju, da su centralne vlasti ovladale Jadranom, izjavljuju, da je cijela Crna Gora uništena. U opšte se prekorava Italija, da je njenim ustezanjem došlo do ovog neuspjeha.

## Savjetovanja u Italiji.

K. B. Rim, 17. januara.

Ministar je predsjednik Salandra imao u ministarstvu spoljnih poslova dugo savjetovanje s ministrima Sonino i Carcano. Kralj je ponovo primio poslanika Tironija i ministra kolonije Martinija.

## Nezadovoljstvo u Francuskoj.

### Želja za zaključenjem mira.

Milano, 16. januara.

Povodom predstojećeg sastanka francuskog parlamenta, javlja pariski dopisnik „Corriere“: „Francusko građanstvo je nezadovoljno tokom rata, jer Francuska ne može da sačeka, da se Njemačka umori glagju. Narod zahtjeva energično produženje rata, ali naglašuje, da treba pomišljati i na blagovremeno zaključenje mira“.

## Velika poplava u Holandiji.

K. B. Haag, 17. januara.

Poplava u sjevernoj Holandiji uzima sve veće razmjere. Stanovništvo napušta čitave okruge. Javlja se o novim provalama visokih nasipa. Željeznički je i telegrafski saobraćaj prekinut na mnogo mjesta.

## Potopljena američka podmornica.

K. B. New-York, 16. januara.

Američka je podmornica „E2“ potopljena uslijed jedne eksplozije kod Brooklyna. Četiri su čovjeka od posade poginula, dok je dvanaest ljudi teže ranjeno.

## Dnevne vijesti.

### Bogojavljenje u Beogradu.

Carski i kraljevski policajni komesarijat objavljuje:

„U sporazumu sa visokoprečasnim protom grada Beograda obaviti će se svečano bogoslužjenje u beogradskoj crkvi na dan Svetoga Bogojavljenja 19. 16. januara o. g. Početak će svete liturgije biti tačno u 9 i po časova. Po svršetku liturgije ići će se sa litijom na Savu radi osvećenja vode. Na svečanosti će biti vojnička parada. Poziva se građanstvo, da prisustvuje bogoslužjenju i vodosvećenju u sabornoj crkvi, pošto će se toga dana samo u njoj služiti sveta liturgija.“

### Dolazak „Balkanzug“-a u Beograd.

Prošlo je već sedamnaest mjeseci od kako je posljedni „Expres-orient“ prošao kroz Beograd. I od tog je vremena u nedjelju ujutru prispio prvi „Balkanzug“ u Beograd. U vozu su bili časnici, industrijalci, novinari centralnih vlasti, Bugarske i Turske, uvjereni, da sada prolaze vozom preko cijelog Balkana, i da njihov put neće biti više ničim ometan.

U tri četvrt sedam izjutra, sa zadocnenjem od 20 časaka ušao je „Balkanzug“ u beogradski kolodvor. Na kolodvoru za čas sve ožive. Radoznali se tiskahu naprijed, da vide simbol nove ere na Balkanu. Putnici izigioše iz svojih vagona i posmatraše unaokolo. „Balkanzug“ je sastavljen

od nekoliko spavaćih kola, sa drečćim natpisom: „Balkanzug“ i imenima glavnih mjesta kroz koja prolazi. Stari natpis međunarodno društvo spavaćih kola“ izbrisan je. Natpisu „internacionalno“ danas zaista nije vrijeme. Ima i nekoliko vagona, koji su naročito sagragjeni za „Balkanzug“. Cio put voza bio je pravi triumf. U Berlinu je voz ispratila velika masa svijeta mašući maramama. U Beču su voz dočekali ministar željeznica, predsjednik policije, predstavnici raznih privrjednih društava, i mnogobrojna publika. U Požunju je dočekan voz sa uzvicima „eljen“ a isto tako i u Budimpešti. Među putni ima nalaze se u vozu dva novinara, zastupnici saveznog i neutralnog novinstva. Pošto su ovdje odkačena dva vagona, koja saobraćaju samo do Beograda, nastavio je voz poslije 20 minuta čekanja, svoj put za Carigrad, preko Niša i Sofije.

## Kako rade srpske vlasti?

Gustav Hervé, koji po primjeru staroga Clémenceau-a svakome u Francuskoj bez ustezanja kaže istinu, optužuje sada u svome listu „Victorie“, srpsko poslanstvo u Parisu. Mi ćemo u vjernom prijevodu da donesemo tu optužbu g. Hervéa, da bi se vidjelo kako se srpske vlasti staraju za svoju braću:

„Posvednevno stižu iz Marseille-a u Paris mala odjeljenja srpskih bjegunaca. Nitko ih ne dočekuje na kolodvoru, i kako neznaju kuda da idu i na koga da se obrate, lutaju po bulevaru Diderot, iznureni, cvokoćući od zime, kao zalutalipsi (chiens errants), koji se vraćaju sa vojišta.“

„Zar ne postoji srpsko poslanstvo u Parisu? Ili je u nemogućnosti, da pomogne ovoj prijekomjernoj bijedi? Zar nema u poslanstvu ljudi, koji znaju srpski, da ove ljude, ove žene i ovu djecu odvede na mjesto, gdje mogu naći utočišta? Mi postavljamo ovo pitanje onim društvima, koja su osnovana u tom cilju, da pomognu nesrećnicima. I mi se nadamo da pitanje neće dugo ostati bez odgovora.“

## Povratak u Beograd.

Svojim su se domovima u Beograd vratili između ostalih: Mihajlo Viktorović, apotekar i Dr. Jovan Maksimović, privatni liječnik.

## Essad-paša u Solunu.

U Solun je stigao Essad paša, da sa vogjama ententskih četa uglavi z jedničku ratnu osnovu. Megjutim će se Essad-paša teško moći povratiti „svojoj“ vojsci u Arbaniju.

## Stigao u Sofiju.

Feik beg Konica, pregjašnji savjetnik princa Wilhelma Wieda, i ministar u trećoj arbanskoj vladi, stigao je iz Švicarske u Sofiju. Feik beg Konica, koji je bio i predsjednik arbanskog kongresa u Trstu 1913. godine, jedan je od najstaknutijih političkih ljudi u Arbaniji.

## Čuvajte se varalica.

Sve se češće čuju žalbe protiv varalica, koje od lakovjernog svijeta izmame novac pod izgovorom, da će kod mjerodavnih učiniti potrebne korake, da im se naknadi šteta, koju su u ratu pretrpili. Mi smatramo stoga za dužnost, da upozorimo pučanstvo, da se čuva varalica, i da sumnjivim ličnostima ne daje svoj novac. Dok traje rat nemoguće je procijeniti pretrpljenu ratnu štetu. Besmisleno je dakle i upućivati zahtjeve za naknadu štete, jer se ovi zahtjevi prije zaključenja neće ni uzimati u obzir.

**Mali oglasnik.**

Lijepo namješten stan, dvije sobe, izdaje se odmah. Ulica Svetog Save br. 16. Odmah više hotela „Slavije.“

**Remington pisaća**

mašina, dobro osnovana, traži se da se kupi. — Knez Mihajlova ulica 53.

**OPERATOR**

**Dr. Slavka Mihajlović,** specialista za ženske bolesti, prima svakog gana od 2—4 sati po podne. Stan Kralj Milanova ul. br. 37.

**Soba sa dva kreveta se traži.**

Prijave u Kralja Milana ulici br. 17, u dućanu.

Prodajem

**pirotski čilim,**

4 metara dugačak, 3 metara širok, potpuno nov i očuvan u lijepim šarama i boji. Cijena po pogodbi. Viditi se može u mom stanu Aleksa Angjelković, Višegradska ulica 14.

**Gospodska kuharica**

traži namještenje

A. F. Kosmajnska ul. br. 12.

**Pisaći astal,**

(Jerry Patent), i Registrator na prodaju, upitati kod oberkellera u Grand Hotelu.

Prvorazredni modni Salon

**I. B. Božić.**

nalazi se privremeno u Skadarskoj ul. br. 19 (Ilićeva kuća) prima na izradu sve vrste toileta, kostima, mantile, i t. d. Za odličnu se izradu garantuje, cijene solidne. U istoj kući se prodaje vrlo lijep persijski čilim.

Srpski, njemački, francuski i engleski jezik

**predaje**

dugogodišnja nastavnica. Posebni i opšti časovi. Zapitati usmeno ili pismeno od 2—3 sata Dobračina ul. 3. ili knjižara MITA STAIĆ, Knez Mihajlova 8.

**Prva Hrvatska**

tvornica cigaretnog papira i tuljaka iz Zagreba

imade tvorničko skladište svojih proizvoda iz najboljeg materijala u Kralja Milana ul. 17.

Knjigovogju sposobnog za biljancu

traži odmah

TRGOVAČKA BANKA

dioničarsko društvo u Zemunu.

Oferti sa referencama i zahtjevom plaće neka se uprave na Trgovačku Banku u Zemunu.

**Joh. Backhausen i Sinovi**

tvornice sukna za pokućstvo, čilimova i gunjeva.

= Beč, .: Opernring 1. =

**Kupujem lijepe**

persijske i pirotke čilime. — Adresa u upravi ovog lista.

**Uregjen stan,**

sastojeći se iz 2 sobe i svim priborom, po mogućnosti i banja, traži se pod najam. Adresa u upravi.

**Meda Lipovca,**

na centrifugu cijedenog, ima na prodaju u Resavskoj ul. br. 45.

Muš srednje doba, trgovački izobražen, vješt njemačkom jeziku u pismu i govoru traži mjesto.

Adresa u uprav ovog lista.

**Kupuje se vino**

iz privatnog posjeda u svakoj količini. — Gostiona „Mali Vojnik“.

**Max Jos. Strahović,**

Profesor za njemački, francuski, ruski i srpski jezik i literaturu. Drži posebne kurseve iz koverzacije i trgovačke korespondencije. Kosmajnska ulica 52. Varoš-Kapija. Beograd.

**Nestali.****Flora Malenić,**

neka javi svoju adresu administraciji „Beogradskih Novina“.

**Mojim prijateljima.**

Moja kći Mica Pavićević, stara 21 godinu, bila je prilikom evakuacije u Požarevcu kao nastavnica ženske radničke škole.

Po mome saznanju vijegna je u Cupriji i Kraljevu.

Molim prijatelje da mi odmah javu, ako su je negdje videli.

Luka Pavićević, predsjednik beogradske opštine.

**Tražim,**

Moju ženu Persu Milanović, i djecu Dimitrija i Milana, koji su nestali septembra mjeseca, prilikom evakuacije Beograda. Svakoga pak molim, ko ma šta o njima zna, da mi javi. Unaprijed blagodaran sam.

Dragutin Milanović, Pančičeva ulica br. 11. Beograd.

U RADNJI

**Russo i Kalmića**

Beograd, Vasina ulica 5.

— preko puta Narodnog Pozorišta —

ima na prodaju jedna velika količina

**obuća-cipela****muških i ženskih**

ROBA ODLIČNA,

cijena niska, — prodaja na jedan par na više.

**DAMSKE ŠEŠIRE**

i bogati izbor ukrasa najjeftinije prodaje i prima opravke

Novi modni salon

S. M. Lazarevića

u vlastitoj kući, Kralja Milana 120 (u dvorištu).

**CARO I JELLINEK DR. S. O. JAMSTVOM**

Beč I., Deutschmeisterplatz 4.

rodužnice: Bodenbach, Budapest, Halbstadt i Trst

preuzimaju prevoze sviju vrsti u balkanske države.

Upute badava.

**Berthold Goldstein**

BEOGRAD, Simina ulica 16

koji po naročitom odobrenju c. i kr. vlasti :: otvorio u Beogradu ::

izvoznju i uvoznju trgovinu

preporučuje za sada svoje usluge za uvoz

životnih namirnica i kon-

sumnih artikala

sviju vrsta. Docnije će početi rad i sa izvozom. Za sada treba brzojave i pisma upućivati na adresu

**Berthold Goldstein, Zemun**

**Tko traži**

namještenje, ili treba radne sile, najbolje je, da oglasi u „Beogradskim Novinama“.

Uprava: Čubra ulica br. 3.

Oglas za namjestanje stoji **50** fillira

Oglas za potražbu radne snage **K 1**—

**Petrolej**

Benzin

Mašinski zejtin

Zejtin za jelo

Terpentin

Ricinov zejtin

liferuje prompt

**Ölfabrik M. Elfer G. m. b. H.**

Wien I., Krugerstrasse 3.

Moja kemička čistiona i bojadisaona odijela, opet je za moje mušterije otvorena.

**Anton Kellner**

Bojadisar i kemički čistilac.

— BEOGRAD, Zeleni venac br. 14. —

Tvornica: DUŠANOVAC, KRALJEVA UL. 16.

Čestiti ljudi ili žene,

koji žele prodavati novine,

**TRAŽE SE.**

Poblize u upravi ovog lista.

PAŽNJA!

PAŽNJA!

— Za sopstvenike mlinova —

**Tarjan und Comp.**

BUDAPEST V. Esáky u. 8.

ustanova za uregjenje mlinova i sva tehnička uregjenja,

liferuje sve vrste mašina za mlinove, kao i sve tehničke artikle za mlinove i tvornice najbolje vrste, po najnižoj cijenama. Kod pregradjivanja mlinova i preuregjenja daje i stručnjačke savete.

**SARDINE U ZEJTINU**

sviju sorta, haringe, južno voće, razne konzerve, tijesto za supu a la Maggi po 5 hellera, čaj i kafu prodaje po najpovoljnijim cijenama

**J. FREUND, PRAG**

Karolinenthal, Palackystrasse Nr. 1.

**Julius Meinl**

importna kuća čaja i kave.

Beč XVI. .: Budimpešta.